

ՍՈՒՐԲԾՆՆԴՅԱՆ ՈՒՂԵՐԶ

Մոսկվայի և համայն Ռուսիո ԿԻՐԻԼ Պատրիարքի
Ռուս Ուղղափառ Եկեղեցու հովվապետներին, հովիվներին,
սարկավագներին, վանականներին և հավատավոր բոլոր զավակներին

Սիրելի՛ ի Տեր հովվապետներ,
արժանապատիվ երեցներ և սարկավագներ, աստվածասեր վանականներ և
միանձնուհիներ, թանկագի՛ն եղբայրներ և քույրեր,

Սրտանց շնորհավորում եմ բոլորիդ մեր Տեր Աստծո և Փրկչի՝ Հիսուս Քրիստոսի Ծննդյան լուսապայծառ տոնի առթիվ և ձեզ եմ ուղղում հին եկեղեցական շարականի խոսքերը. *«Քրիստոսը ծնվում է՝ փառավորեցե՛ք. Քրիստոսը երկնքից է՝ դիմավորեցե՛ք. Քրիստոսը երկրի վրա է՝ բարձրացե՛ք»* (Եռմոս Ա. երգի Սբ. Ծննդյան կանոնի):

Պողոս առաքյալն Աստծո մարմնավորման կատարված իրադարձությունն անվանել է *«բարեպաշտության մեծ խորհուրդ»* (Ա Տիմոթ. 3:16): Այս խորհրդի առջև ահուդողով լռում է ցանկացած երկրային մտածողություն: Նրա առջև խամրում է մարդկային ունայն գիտելիքը: Այն ունակ է զինաթափելու և մեղմացնելու ամենակոպիտ և քարացած սիրտը: Այս դաժան և չարացած աշխարհի մեջ է ծնվում Մեկը, Ով Միայն կարող է բուժել ցանկացած բաժանվածություն, պարզել մեզ իսկական խաղաղություն և իրական երջանկություն:

Այն պահից, երբ մեղքը մուտք գործեց մարդկային կյանք, երկրի վրա թագավորեց ողբերգական բաժանումը, և աշխարհը, կտրված Արարչից՝ լույսի իսկական Աղբյուրից, անխուսափելիորեն սկսեց ընկղմվել խավարի և քաոսի մեջ: Սակայն Աստված չլքեց Իր արարչությունը և անխնամ չթողեց այն: Համբերությամբ նախապատրաստելով մեր փրկությունը, Տերը մարմնացավ, մուտք գործեց երկրային պատմություն և դարձավ մեզնից մեկը: Աստծո Որդին դարձավ Մարդու Որդի՝ ամեն ինչում նման մեզ, բացի մեղքից: «Ո՞ր ես դու, Ադամ» վշտալից հարցը, որը երբեմն հնչել էր Եդեմի դրախտային պարտեզում, վերջապես գտավ իր պատասխանը Բեթղեհեմի մոտ գտնվող աղբատիկ քարանձավում: *«Առաջին մարդը երկրից էր, հողեղեն. երկրորդ մարդը՝ Տերը՝ երկնքից»* (Ա Կորնթ. 15:47), ինչպես գրել է Պողոս առաքյալը: Քրիստոսի մեջ, որպես՝ նոր Ադամի, *Աստված հաշտեցրեց աշխարհին Իր հետ* (Բ Կորնթ. 5:19), նորոգեց մարդկային բնությունը՝ բուժելով այն մեղքի վերքերից:

Մարդու կյանքը և ամբողջ աշխարհի կյանքը բուժվում են միայն Աստծո մեջ. ահա այն պարզ, բայց շատ կարևոր ճշմարտությունը, որի մասին վկայում է այս տոնը: Ինչպե՞ս այստեղ չհիշել երանելի Օգոստինոսի ոգեշնչված խոսքերը, որը սուրբ երկյուղով փառաբանել է Ամենակալի իմաստուն Նախախնամությունը. *«Դու մեզ ստեղծեցիր Քեզ համար, և մեր սիրտը հանգիստ չի գտնում, մինչև չհանգստանա Քո մեջ»* (Խոստովանություն): Միայն Հիսուս Քրիստոսի մեջ է գտնվում միությունն Աստծո հետ և աշխարհի արարչագործությունից ի վեր հավիտենության կոչված մարդու կյանքի իսկական իմաստը:

Փրկչի աշխարհ գալը, նախ և առաջ մարդկանց հանդեպ Աստվածային սիրո հայտնությունն է. սիրո, որը մի կողմից անսահման է և ամենահաղթ, իսկ մյուս կողմից՝ հեզ, որը *ամեն բան ծածկում է, ամեն բանի հավատում, ամեն բանի հանդեպ հույս ունի և ամեն բանի համբերում է* (Ա Կորնթ. 13:7):

Իսկ ինչպե՞ս մենք արժանի կերպով պատասխանենք մեր Արարչի մեծ սիրուն և մոտենանք Նրան: Այս մտերմությանը մենք հասնում և հաստատում ենք ավետարանական պատվիրաններին հետևելու, համբերության և միմյանց հանդեպ անկեղծ սիրո, և գլխավորապես՝ Սուրբ Հաղորդության Խորհրդով Քրիստոսի հետ մեր միության մշտական նորոգության միջոցով:

Այսօր հույսի տոնն է: Խաղաղության տոնն է: Խաղաղ ուրախության տոնն է: Փառաբանելով Ծնված Փրկչին և դիմավորելով Նրան գեղեցիկ երգեցողություններով և եկեղեցական շարականներով՝ հիշենք քրիստոնեական բարձր կոչումը՝ *լինելու աշխարհի լույսը և երկրի աղը* (Մատթ. 5:13–14) և, *բանի դեռ ժամանակ կա, բարին գործենք բոլորի հանդեպ, մանավանդ հավատի մեջ մեր հարազատների* (Գաղ. 6:10):

Նվիրենք հույս վշտացածներին, մխիթարեն տրտմածներին, կիսենք ուրախությունը մեր մերձավորների և հեռավորների հետ, և օգնենք կարիքավորներին. այդպես վարվելով՝ մենք իսկապես կդառնանք *Քրիստոսի բուրմունքն Աստծո առաջ* (Բ Կորնթ. 2:15) և հաճելի ընծաներ կբերենք Ծնված Տիրոջը:

Իսկ նրանց, ովքեր տարբեր հանգամանքների պատճառով դեռ Եկեղեցու փրկարար ցանկապատից դուրս են գտնվում և չեն մասնակցում Քրիստոսի համայնքի կյանքին, դիմում եմ կոչով. բացե՛ք ձեր սիրտը Նրա առաջ, *Ով այնքան սիրեց մեզ, որ Իր Միածին Որդուն տվեց, որպեսզի յուրաքանչյուր ոք, ով հավատում է Նրան, չկորչի, այլ հավիտենական կյանք ունենա* (Հովհ. 3:16):

Ուրեմն փառաբանենք Տիրոջը և Փրկչին մարդկային ցեղի հանդեպ Նրա անասելի ողորմության և սիրո համար:

Շնորհավորելով բոլորիդ Սբ. Ծննդյան տոնի առթիվ՝ մաղթում եմ ձեզ, իմ սիրելիներ՝, ուժերի ամրություն և անսպառ ուրախություն Ծնված Փրկչով: *Շնորհ և խաղաղություն՝ և ձեզ մեր Հայր Աստծուց և Տեր Հիսուս Քրիստոսից* (Եփես. 1:2): Ամեն:

ՄՈՍԿՎԱՅԻ ԵՒ ՀԱՄԱՅՆ ՌՈՒՄԻՈ ՊԱՏՐԻԱՐԺ

Սուրբ Ծնունդ

2025/2026 թթ.

ք. Սոսկվա